

等語臣等伏查汴洛之購地興工道清之行車各事以及籌辦鐵路法文學堂各節皆與路政之成敗利鈍大有關係所有盛宣懷現派各員能否勝任愉快及平時植品如何臣等尙未深悉惟汴洛道清兩路均係蘆漢之分枝至籌設法文學堂尤爲各該路需才孔亟起見應請俟簡派會辦蘆漢鐵路大臣後由該大臣察酌情形統籌一切再行報部奏明辦理臣等往返籌商意見相同是否有當謹附片具陳伏乞 聖鑒謹奏奉 旨依議

商部北洋大臣會奏 簡派唐紹儀會辦蘆漢鐵路摺。。

奏爲遵 旨議復事光緒三十一年八月初九日准軍機處鈔交前工部侍郎盛宣懷奏路政重要請 簡派會辦大員一摺奉 旨著商部會同袁世凱妥議具奏欽此傳知前來查原奏內（原奏已見本報故略）等語臣等查鐵路爲 國家富強要政亟應推廣自造盛宣懷綜持路務十年於茲由蘆漢而推及滬甯粵漢正太汴洛各路均經議借洋款次第籌築加以現訂借款購回之道清鐵路及官款自造之萍潭運煤枝路艱難締構略具宏規惟是萬緒千頭獨資肇畫其所慮顧此失彼之處亦屬實在情形卽如蘆漢鐵路四月間欽奉

明諭令臣等督飭盛宣懷認真整頓妥議章程並責成商部稽查款項各節迭經臣等分別調取案據辦法帳册等件就已經咨送者逐項簽註列論飭令聲復其按月工程行車兩處之造送帳册亦正在調查報部路務繁重亟須佐理得人且各路借款頗鉅權利多半爲外人所持尤應精選諳練西律才識卓越之員相助爲理就合同所載一切應有核准酌奪稽查極大之權實力擴充使進款增多出款核實獲利既厚應償本息不至稍誤而應有事權亦可逐漸收回裨補當非淺鮮臣等公同商酌添派會辦誠爲目前要著查有二品銜署理商部左丞唐紹儀才猷卓著優習外交當能勝會辦蘆漢大臣之任合無仰懇 天恩俯念該幹路行車以後關係拔本還息並附有汴洛道清等各枝路事體重大請迅 賜簡派責令會同盛宣懷整頓一切臣等仍當遇事督率逐款稽查以期仰副 朝廷慎重路工收回利權之至意除盛宣懷另片奏派滬甯鐵路會辦應由商部再行遵 旨議覆外所有會議蘆漢鐵路應請 簡派會辦大員緣由謹恭摺具陳伏乞 皇太后 皇上聖鑒訓示再此摺係商部主稿合併聲明謹奏九月初七日奉 旨依議